



Акафист

святому преподобному

Арсению, Коневскому

чудотворцу

Кондак 1

Избранный чудотворче и предивный
угодниче Христов, преподобне отче наш
Арсение, благий и верный рабе Господень, труды
и подвиги твоими восток и север озарил еси.
Прославляя прославльшаго тя Господа,
похвальная восписуем ти, яко усердному
служителю Богоматере; ты же, яко имеяй
благодать молитися за ны, поминай нас,
любовию тебе поющих:

Радуйся, преподобне Арсение, Коневский
чудотворче.

Икос 1

Ангельски жити желая, во ангельский образ
облеклся еси и на земли небесный человек
явился еси, темже ангельскими гласы подобаше

и восхвалити тя, преподобне отче Арсение; но аще и грехи обременени есмы, обаче с любовию дерзаем человеческая славословия воспети ти сице:

Радуйся, Новаграда Великаго древо Богонасажденное; радуйся, плоды добродетелей миру принесшее. Радуйся, любве сокровище неизживаемое; радуйся, мира Божественнаго вместилище благоуханное. Радуйся, терпения источниче неизсякаемый; радуйся, благодати кладязю благодати неизчерпаемый. Радуйся, милосердия пучино безмерная; радуйся, веры правило известнейшее. Радуйся, кротости образе изряднейший; радуйся, воздержания учителю предивный. Радуйся, тяготы греховныя притекающих к Тебе носителю; радуйся, Закона Христова усердный исполнителю.

Радуйся, преподобне Арсение, Коневский чудотворче.

Кондак 2

Видя жития сего непостоянное и в мире всяческую суету, преподобне отче Арсение, от юности своея потщался еси украшатися добродетелей виды и приуготовлятися в Вышний Сион, во град Бога Живаго, идеже

ныне со тмами Ангел и всеми святыми поеши:
Аллилуия.

Икос 2

Разум неудоборазумеваемый, сокровенный святым в Небесном Иерусалиме, постигнути желая, земная отринув, во обитель в пределах Новаграда на горе вселился еси, преподобне отче Арсение, и тамо ангельски пожив, путь был еси ко спасению всех, вопиющих ти сицевая:

Радуйся, нищих духом в Царствие Небесное водителю; радуйся, плачущих по Бозе утешителю. Радуйся, кротких к дивному наследию приуготовителю; радуйся, алчущих правды истинный насытителю. Радуйся, жаждущих вечная жизни сладкое питье; радуйся, милостивых невидимый соучастниче. Радуйся, чистых сердцем смиренный учителю; радуйся, миротворцев любвеобильный наставниче. Радуйся, изгнанных правды ради верный спутниче; радуйся, терпящих поношения за Христа сострадателю. Радуйся, со всеми святыми вселивыйся; радуйся, во Царствии Отца Небеснаго, яко солнце, просветивыйся.

Радуйся, преподобне Арсение, Коневский чудотворче.

Кондак 3

Сила Вышняго подвизаше тя, преподобне отче Арсение, на большия подвиги, и душа твоя желаше к Богу Крепкому – Живому, яко жаждущий елень на источники водныя; сего ради изшел еси из земли отечества твоего в гору Афонскую, в удел Богоматере достигл еси, поя Богу: Аллилуия.

Икос 3

Имея ум богозрительный и восхотев добродетели своя утаити, да Отец Небесный, видяй втайне, воздаст тебе явно, сего ради во обитель Святогорскую достигл еси, преподобне отче Арсение, и тамо от игумена Иоанна к общему деланию с братиею сопричаститися благословение приял еси, мы же, видя произволение твое благое, взываем ти сице:

Радуйся, добродетельми своими небесныя дары стяжавый; радуйся, благим житием праотцем святым подражавый. Радуйся, яко Авраамову веру в Бога приобрел еси; радуйся, яко Исааково послушание имел еси. Радуйся,

яко Иаковля Боговидения сподобился еси; радуйся, яко Иосифово целомудрие облобызал еси. Радуйся, яко Иовле терпение снискал еси; радуйся, яко Моисеево сострадание стяжал еси. Радуйся, яко Самуилово Богопризвание услышал еси; радуйся, яко Давидову кротость восприял еси. Радуйся, яко Илиину ревность по Бозе в сердце твоём носил еси; радуйся, яко Даниилово обителище Духа Святаго был еси.

Радуйся, преподобне Арсение, Коневский чудотворче.

Кондак 4

Бурею печали исполнися блаженный Иоанн, егда ты, преподобне отче Арсение, по триех летех в северную страну возвратитися восхотел еси; провидев же о тебе Божественное Промышление, благослови тя в путь, моляся глаголаше: «Господи Боже отец наших, от Престола славы Твоея призри на раба твоего Арсения, да почиет на нем всегда благодать Духа Твоего Пресвятаго, да поет Ти: Аллилуия».

Икос 4

Слышаша иноцы Афонстии, яко блаженный Арсений оставляет гору Афонскую, бяху скорбни

зело; прозорливима же очима усмотрив будущая, игумен Иоанн вручаше ти образ Богоматере со Предвечным Младенцем и глаголаше сицевая:

Радуйся, яко тобою Бог воздвигнет в стране северней обитель; радуйся, яко тамо посрамлен будет искуситель. Радуйся, яко за усердие к Богоматери мзду восприимеши; радуйся, яко от Сына Ея на небесех прославишися. Радуйся, яко Ангелом собеседник будеши; радуйся, яко человеком наставник добр явишися. Радуйся, новое светило хладного севера; радуйся, любовью Христовою мрак суеты разгнавшее. Радуйся, яко тобою мнози сладость жизни духовныя уразумеют; радуйся, яко земнии ликом Ангельским сопричастницы будут. Радуйся, звезда, путь ко Христу указующая; радуйся, солнца мысленного – святые иконы Богоматере колеснице.

Радуйся, преподобне Арсение, Коневский чудотворче.

Кондак 5

Боготечней звезде уподобився, от востока на север в Великий Новград притекл еси, преподобне отче Арсение, и в нем благословение

на устроение обители во имя Пречистыя Девы приял еси от святителя, иже лобызаше принесенную тобою икону Богоматере и со слезами вопияше: Аллилуия.

Икос 5

Видев тя добродетели многими преисполнена, святитель Новаграда с благословением дарует тебе некая потребная ко устроению обители новыя, и прием сие благоговейно, преподобне отче Арсение, на ладии по реце Волхову и великому Ладожскому езеру в Валаамскую обитель достигл еси; мы же мысленными очесы зряще тя путь творяща, взываем в похвалу твою таковая:

Радуйся, отче, отцев мужества соименный; радуйся, всего себе в волю Божию предавый. Радуйся, иго благое на себе совершенно восприемый; радуйся, бремя Христово легче понесый. Радуйся, труждающихся о Господе незримый помощниче; радуйся, грехми обремененных к покаянию наставниче. Радуйся, окамененнаго нечувствия отгнателью; радуйся, во отчаянии сущим благия надежды подателю. Радуйся, кротость Христову восприемый; радуйся, смирению Его притекающих к тебе

научивый. Радуйся, монашествующих покрове и утверждение; радуйся, всех верных человек упование.

Радуйся, преподобне Арсение, Коневский чудотворче.

Кондак 6

Проповедник твоего добродетельнаго жития и чудес от иконы Богоматере, по пришествии твоем на остров Коневский, явился рыбарь Филипп, иже любезне прият тя, преподобне отче Арсение, и с тобою пояше Богу: Аллилуия.

Икос 6

Возсиял еси светом добродетелей твоих во острове Коневстем, идеже, яко пустыннолюбная горлица, вселився и уединенное житие пожив, на месте обитания твоего первее честный Крест водрузил еси; уведев же, авва Сила посла инока Лаврентия, да призовет тя паки во обитель Валаамскую, он же пришед и видево богоугодное житие твое, преподобне отче Арсение, глаголаше тебе сицевая:

Радуйся, Богом управляемый подвижниче; радуйся, Девы Марии истинный служителю. Радуйся, Божия правды дивный проповедниче;

радуйся, лжи нелицемерный обличителю.
Радуйся, веры правья насадителю; радуйся,
суеверия искоренителю. Радуйся, целомудрия
наставниче; радуйся, послушания учителю.
Радуйся, ненавидения разрушителю; радуйся,
мира Божественного всеятелю. Радуйся,
подвизающихся о Господе укрепителю; радуйся,
в грехи впадших исправителю.

Радуйся, преподобне Арсение, Коневский
чудотворче.

Кондак 7

Хотящу ти, преподобне отче Арсение, обитель
во острове Коневстем создати, первее малый
храм в честь Богоматере воздвигл еси, в онъже
притекаху хотящии шествовати путем
добродетельнаго жития и пояху Богу: Аллилуия.

Икос 7

Новое чудо сотворил еси, егда со всеми
собравшимися к тебе, икону Богоматере взем и
к нарицаемому КонюКамени пришед,
прилежным молением злых духов, тамо
живущих, отгнал еси; мы же, ведяще сие, в
похвалу тебе, преподобне отче Арсение, взываем
таковая:

Радуйся, постом и молитвою диавола посрамивый; радуйся, крестом от козней вражиих себе оградивый. Радуйся, от КоняКамене злых духов прогнавый; радуйся, от прелести лукаваго окрестных людей избавителю. Радуйся, соль земли, от воды крещения раждаемая; радуйся, силою Божественною притекающих осоляющая. Радуйся, граде Христов, на верху горы стоящий; радуйся, светом небесным украшенный. Радуйся, светильниче, в мире сем добродетельми светящий; радуйся, к Богу и ближним любовью горящий. Радуйся, обуреваемых ересью тихое пристанище; радуйся, православия столпе непоколебимый.

Радуйся, преподобне Арсение, Коневский чудотворче.

Кондак 8

Страннолюбив зело, яко древний Авраам, был еси, преподобне отче Арсение; ненавиждяй же добрая диавол восхоте добродетели сей препятие сотворити; егда убо ты уразумел лукавство его, тогда общее учреждение приходящим ставити повелел еси, воспевая питателю всех Богу: Аллилуия.

Икос 8

Весь воистину сам себе и всю собранную во обители нове братию попечению Богоматере вручил еси, преподобне отче Арсение, егда по летех неких паки на гору Афонскую к стопам подвига, отцем святым отыти восхотел еси; богособранная же чада твоя, провождающе, зваху ти сицевая:

Радуйся, наставниче благий, попечению Богоматере нас вручивый; радуйся, никогдаже в отчаяние впадати научивый. Радуйся, паче всего искати Царствия Небеснаго завещающий; радуйся, яко ищущим сего приложатся и земная, глаголавый. Радуйся, плоть свою духу покоривый; радуйся, плоды духа миру явивый. Радуйся, служителю Божий, Христови сраспявыйся; радуйся, сосуде Божественныя благодати. Радуйся, яко тобою Бог прославляется; радуйся, яко тобою демоны посрамляются. Радуйся, печальных велие утешение; радуйся, скорбящих нечаянное радование.

Радуйся, преподобне Арсение, Коневский чудотворче.

Кондак 9

Вси иноцы во обители твоей, преподобне отче Арсение, скорби велией предашася, умедлившу ти на Афоне: глад бо тяжек и скудость многа постиже их и хотяху разытися кийждо восвояси; сия же им помыслившим, явися во сне Матерь Божия возлюбленному ученику твоему старцу Иоакиму, скорбящу о сем зело, и рече ему: «Не скорби, старче, но шед рцы братии, да пребывают во обители, ибо слуга Мой Арсений со множеством потребных вскоре грядет к вам, поя Богу: Аллилуия».

Икос 9

Витии сладкоглаголивии не могут изъяснити добродетели и чудеса твоя, преподобне отче Арсение; слышав бо таковая, восхоте приити к тебе из Новаграда, пользы ради духовныя, святитель Христов Евфимий, иже пришед и тако возлюбил тя, яко первосвятительский ветхий клубок свой дарствова тебе, глаголя сицевая:

Радуйся, земный Ангеле и небесный человеце; радуйся, согражданине святым и присный Богу. Радуйся, ветхаго человека со страстьми отложивый; радуйся, во Христа облекийся.

Радуйся, дивный ратоборче, вся оружия Божия восприемый; радуйся, обитель во имя Богоматере создавый. Радуйся, кознем врага противоставый; радуйся, Святаго Духа чистое жилище. Радуйся, добродетелей вместилище; радуйся, заповедей Божиих светлосте. Радуйся, оправданий Господних сияние; радуйся, уединенное житие возлюбивый.

Радуйся, преподобне Арсение, Коневский чудотворче.

Кондак 10

Спасти хотя от опасности водныя обитель твою на возвышенное место преселил еси, преподобне отче Арсение, и устав, святыми отцы преданный, оставив, вместо себе игуменом старца Иоанна избрал еси, поя Богу: Аллилуия.

Икос 10

Стену и прибежище, икону Владычицы Святогорскую, живущим во обители твоей оставив и Святых Тайн причастився, предсмертный завет завещавал еси, глаголя: «Аще пребудете в законе Господни, то не оскудеет обитель сия и Мать Божия покровительницею ея будет», таже по словесех

сих дух твой Господеви предал еси, преподобне отче Арсение, окружающий же одр твой взываху сицевая:

Радуйся, яко пред исходом в вечную жизнь Хлебом Небесным себе подкрепивый; радуйся, яко пред смертию твоею чашу Господню испивый. Радуйся, светило православия, на севере неба возшедшее; радуйся, к Небесному Свету, Христу Богу достигшее. Радуйся, яко от веры жив пребываеши; радуйся, яко по исходе твоём духом нас не оставляеши. Радуйся, новый наш пред Богом предстателю; радуйся, молитвенниче о душах наших теплейший. Радуйся, святе, к ликом святых сопричтенный; радуйся, праведниче, в покой небесный достигнувший. Радуйся, трудов твоих достойную мзду восприемый; радуйся, рабе благий, в радость Господа своего вшедый.

Радуйся, преподобне Арсение, Коневский чудотворче.

Кондак 11

Пение всякое не довлеет к прославлению чудес твоих, преподобне отче Арсение, по преставлении бо множицею повсюду являлся, от потопления спасаеши и от болезней исцеляеши

притекающих к тебе и вопиющих Богу:
Аллилуия.

Икос 11

Светозарен весь явился, старца Моисея с
рыбари от потопления спасл еси, слепцу в
Новеграде представ, на исцеление во обитель
твою послал еси, расслабленного инока
Лаврентия укрепил еси, Иоанна от изступления
ума исправил еси, преподобне отче Арсение, они
же от бед и болезней избавльшися,
благодарственно зывают ти сицевая:

Радуйся, до смерти в мире сем скорбное
житие по Бозе препроводивый; радуйся,
мирскую суету о Христе препобедивый. Радуйся,
по смерти делами веру твою извествуеши;
радуйся, яко являясь людям, велия чудеса
совершаеши. Радуйся, обетований Христовых
наследниче; радуйся, славы Его сопричастниче.
Радуйся, от потопления спасение; радуйся,
слепцев прозрение. Радуйся, расслабленных
исцеление; радуйся, изступивших из ума
исправление. Радуйся, заблуждших наставниче;
радуйся, обуреваемых помощи.

Радуйся, преподобне Арсение, Коневский
чудотворче.

Кондак 12

Благодать творити чудеса дивная дана ти
есть от Бога, преподобне отче Арсение;
Афанасия бо со другом его из плена Свейскаго
избавил еси, зело скорбящему иноку в
Валаамстей обители во сне представ, в свою
обитель послал еси его, и просящу молитв о нем,
рекл еси ему: «Аще воздержишия от вина и
многоглаголения, то моление сотворю о тебе»,
взывая к Богу: Аллилуия.

Икос 12

Поюще твоя чудеса, восхваляем тя,
преподобне отче Арсение, и чтим святую память
твою, вопиюще в похвалу сицевая:

Радуйся, Царя царей – Христа Господа
служителю; радуйся, небесных сил сожителю.
Радуйся, православия утверждение; радуйся,
ересей посрамление. Радуйся, болящих
исцелителю; радуйся, из плена избавителю.
Радуйся, во истине призывающих послушателю;
радуйся, скорбных сердцем утешителю. Радуйся,
верных прославление; радуйся, неверных
обличение. Радуйся, плачущих о гресех пред

Богом ходатаю предивный; радуйся, кающихся отец чадолюбивый.

Радуйся, преподобне Арсение, Коневский чудотворче.

Кондак 13

О преподобне и достославне отче наш Арсение, утешение скорбящих и исцеление немощствующих, приими ныне малое сие приношение и от будущия муки избавится всем нам Господа умоли, да с тобою вопием Ему: Аллилуия.

(Этот кондак читается трижды, затем икос 1 и кондак 1)

Молитва

О преподобне отче наш Арсение, зрителю неизреченная славы в Небесном Царствии. Не остави обитель твою, в нейже труды и подвиги о Христе подъял еси, но сохрани ю в мире и тишине, да пребудет незыблема от ухищрений врагов видимых и невидимых. Укрепи в доброделании чад твоих, их же собрал еси, мудре, во обитель твою, да познают звание свое, да будут достойни попечения о них Богоматере. Посети с высоты небесныя всех, верно

притекающих к тебе животворною твоею молитвою. Плавающих на мори управи. Волнения моря жития сего утиши. Церковные раздоры укроти. Мир миру у Господа всем нам испроси. Болящих уврачуй спасительным твоим заступлением. В скорбех буди утешитель и наставник благий. Всем буди вся, яко же был еси и в земнем житии твоём. Сотвори к Богу молитву, ибо дана ти есть благодать молиться за ны. Вемы бо, вемы воистину, яко много может молитва праведника, поспешествуемая ходатайством Богородицы. Аще и недостойны есмы, обаче и нас вручи Ея всесильному покрову и заступлению, да сподобимся улучшить блаженство в Царствии Сына Ея, Христа Бога нашего, купно с тобою и всеми святыми во веки веков. Аминь.

